

卷

施

閣

集

學使北江先生少孤其克自樹立及學之有成實稟賢  
母蔣太夫人之教故其編詩也以及侍太夫人所作者  
爲附鮪軒集八卷漢書地理志會稽鄞縣有鮪崎亭南  
越志巢鮪長寸餘大者長二三寸腹中有蟹子如榆莢  
合體共生俱爲鮪取食郭璞江賦所謂瓊蛸腹蟹是也  
先生十歲始就外傅二十卽出授徒負米所至皆不越  
五百里外一歲必兩歸以慰太夫人與莢蟹之早出暮  
入相類及奉太夫人諱讀禮於閭門者二年繼又饑驅  
四方十年乃獲升上第官禁林逾一歲卽持節視學黔  
中人欣先生之遇而不知先生以祿不逮養每與人言  
之輒泣下不止爾雅卷施草拔心不死先生之名集蓋

以此乎卷施集自己亥至癸丑已得十四卷門下之士  
乞刊之于黔中遠覽在里門日卽受先生之知今又從  
官牂柯先生之所以待遠覽者未嘗以屬吏視之也今  
遠覽行以老乞休矣先生門下士以遠覽知先生尚深  
乞爲序刊詩歲月因卽遠覽之所以知先生者序之至  
詩之工拙世之知先生者甚多非遠覽之所敢及也時  
乾隆五十九年歲在甲寅新正十日鎮遠縣知縣署黎  
平府下江通判河南張遠覽謹序

卷一

備書東觀集 古今體詩九十二首

卷二

憑軾西行集 古今體詩五十四首

卷三

仙館聯吟集 古今體詩七十八首

卷四

官閣圍爐集 古今體詩三十三首

卷五

太華凌門集 古今體詩三十八首

卷六

中條太行集 古今體詩八十二首

卷七

緱山少室集 古今體詩一百二十一首

卷八

靈巖天筑集

古今體詩一百三首

卷九

西苑祝釐集

古今體詩七十九首

卷十

祕閣研經集

古今體詩八十二首

卷十一

五經聯騎集

古今體詩五十三首

卷十二

黔中持節集

古今體詩一百三十六首

卷十三

黔中持節集 古今體詩一百四十六首

卷十四

黔中持節集 古今體詩八十六首

卷十五

關嶺衝寒集 古今體詩九十首

卷十六

蓮臺消暑集 古今體詩八十首

卷十七

回舟百嶠集 古今體詩一百十三首

卷十八

侍學三天集 古今體詩一百四十八首

卷十九

全家南下集 古今體詩一百十八首

卷二十

單車北上集 古今體詩一百四十四首

卷施閣詩卷第一

陽湖洪亮吉著

備書東觀集已亥庚子

句容別朱三潞時朱居憂抱疾幾殆閱而贈之

一心願汝作頑石我歸來兮石不泐

高郵金秀才蘭以戊戌十月與亮吉訂交越月來會母  
葬事畢將反同人集味辛齋作詩送之并索亮吉詩  
謹賦此首

死生離別杳難支復向城西餞素知窮歲水霜行未定  
高原風木泣多時君因作贅悲身計我愧論交有鬢絲  
夢折素梅聊贈遠孤蓬才發已相思

清明後一日與孫大攜酒飲王七秀才廷俞南圃歸過

縣門憶亡友林嗣基作

晚唸朝咏寄蕭騷王七園前一樹桃接翼水禽窺綠鬢  
連枝風蓋墮青袍君從愁裏何妨醉我覺塵中尙可豪  
歸路忽驚官閣過又教鉛淚滴城壕

勞勞身計本無涯生儻多愁死亦佳閱世短于欹枕夢  
招魂長入酒人懷琴書風捲知誰在花月尊空與願乖  
欲把閒蹤比飛絮年年開落縣南街

揚州別汪大端光

木葉暗天地雨聲連曉昏吾行數千里別子舊東門家  
在依鄉黨親亡憶弟昂猶餘尼父歎三至席難溫

渡河寄孫大星行

春林綿綿雨聲接紅白花飛雜黃葉黃飄一葉忽入樓  
樓上獨客生春愁讀書先忘歲終始瞥眼韶光已如此  
同經憂患傷年少太息前遊成隔世荒墳三尺少婦棲

謂孫大  
喪婦

吾家墓門雅亦啼頻年禮俗斥凶服只有訪子

還麻衣麻衣不共蟬蛸死失母尤愁對妻子塗窮歌哭  
止從君百里遙遙共江水君家大母顏色溫一載撫我  
如撫孫華陽席中多友朋屬爾作弟吾爲最窮冬風雪  
記出門遠遣瘦鬼隨饑鬼三條銀燭共校文暇拊沮頡  
談巴蔡吾儕作客尤狂放哭母傷妻一堂上丈人知我  
自不憎

謂劉雲  
房先生

同輩相看訝無狀言狂甯失座上歡性

分屈曲非能堪錢刀生計亦偶爾我輩于分難饑寒層  
紅疊翠江南地草草狂歌人亦忌插架奇書送爾歸連  
床別夢勞予記鳩兮喚侶我別家挂席百里隨風雅平  
生性命視知己得一死友殊堪誇此時憶君顏不華醉  
裏擾擾人聲譁遙程豈止無一花青草路斷飛黃沙

高郵哭亡友賈田祖

城角參差暮雨昏水程何處弔騷魂吟狂陋巷三間屋  
骨冷高原尺五墳遺業尙存通德里舊交直軼古夷門  
囊錢斗酒江南路他日相期報慙孫

丙申夏予留滯太  
平幾不能行先生

假錢攜  
酒送歸

握別盟言未敢寒重泉書去杳漫漫承家久已傷羊舌

論史何應食馬肝公子才名終不達故人歌哭總無端  
霽昏蠹蝕三千字忍向燈前掩淚看

夜行宿遷道中

荒原真歎馬行遲不定陰晴四月時破澗怒雷分雨勢  
斷崖高樹表風枝無家已絕經年夢有約先懸出世思  
他日故巢相憶處好尋芳草寄卷施

邳州城外

十里涼雲拂柳絲野花香破酒醒時征衫幾日塵沙斲  
怕向谿頭看鷺鷥

偶成

荒塗百里夜程輕破暝重從石磧行天濶露寒人不見

忽驚郵外雨絲明

過永濟橋

塗長客意勞持火出層塚小市人聲亂危橋馬影高岸  
風清薄酒林露滴垂桃晨氣還成雨微寒入紵袍

曉行

郵雞喔喔酒全傾擁被求衣事曉行四野月明迷向背  
一山雲出定陰晴春殘苦乏加餐信道遠愁非負米程  
醉醒十年前事起馬頭塵夢較淒清

過蕭望之故里

西京獄吏皆丞相東海蕭生偶抱關讀罷辭碑無一事  
支頤還望馬陵山

經術崇隆位望冠元成太傅總奇才彭宣枉自稱方正  
不及朱游和藥來

滕文公廟

商鞅立新法大啟陌與阡子居謀王道更欲建井田強  
秦以滅秦二世社以遷滕亡祀則存廟食普萬年我來  
謁荒祠悼歎小國君遺像一畝宮五十里致虔霸術豈  
足矜謀國須大賢

四鼓行嶧縣道中

高原墳樹古人鬼或同經夜氣沉殘月天風動大星未  
愁前路暗不斷此山青向曉寒尤勁車前雨脚腥

謁孟廟

落落非無志，囂囂亦有承。吾猶距楊墨，真不遠齊滕。小  
邑衣冠肅，崇祠俎豆增。摩挲讀碑字，應愧歷階升。  
憶賃東西廡，曾傳內外篇。承師北堂上，勤學斷機前。幼  
賤同尼父，親喪愧少連。寢筵虔拜謁，心折爲三遷。

客舍

紙屋繩床擁敗衾，鳴雞聲裏慘晨陰。星離雨絕書難達，  
山亂雲荒夢欲沉。香奩反蒐勞曼倩，草尋益母泣曾參。  
應憐孤露餘生鬢，無復髫年入世心。

東阿謁西楚霸王墓

松柏曾無半畝宮，蒿萊時起憤王風。學書我亦慚無就，  
刻劍君應恨未窮。十載通侯酬項伯，千秋大義戮丁公。

猶餘一事逃清議  
賣友誰誅呂馬童

滋陽謁柳下惠墓

斷水鄰鄰樹色昏  
行人駐馬揖空邨  
孤羈我下無家淚  
三黜誰招去國魂  
偶食廟牲齊下邑  
愁逢海鳥魯東門  
傷心死士偏寥落  
曉日樵蘇上冢屯

五日客感

節物關心淚暗滋  
斜陽原上泣多時  
殘鷲驛路聲無緒  
瘦馬崑山骨不支  
五日花開憐客久  
重泉家在恨歸遲  
愁看弱弟同行役  
相對昏鐙理鬢絲

與黃大景仁話舊

壯志都從憂患移  
別離如夢見猶疑  
尋山蹤跡誰還健

戴斗文章爾獨奇，塵海此時容小住。  
書倉終日坐長饑，朝來欲上燕臺望。  
好覓天街瘦馬騎。

十五年前將母身，同攜襍被出城闈。  
緣知來日非今日，已覺吾親卽若親。  
晚歲互看謀粟米，衰齡密共禱星辰。  
登堂此度先垂涕，我已傷心作鮮民。

傭書

傭書生計尙淹留，并疊塗懷事校讎。  
獨窻見人殊惘惘，饑鳥得樹亦啾啾。  
雲和草色荒三徑，月與花光艷一樓。  
却歎軟紅塵裏逐，放教愁坐轉忘愁。

小病

佳時曾少出遊車，側屋三椽此寄居。  
失喜遠書來酒後，

持得季 却憐新病入秋初  
名花作果香偏異 野雀隨人  
性亦疎 拋得世緣耽學靜  
鬢絲一月未經梳

得孫大江甯書却寄

櫻桃一樹傍紅牆  
書到翻憐客異鄉  
酒癖更沾衣袂溼  
花疎時入枕函香  
刪除好夢緣妨睡  
檢點閒身未肯狂  
我欲悟君先學道  
攜編三月坐匡牀

憶汪大端光

淮南冀北經千里  
除却孫郎便憶君  
小別正當春後雨  
封書欲寄隴頭雲  
人輕詞客張三影  
天與揚州月二分  
珍重綺年題綺句  
莫教前輩擅清芬

夢入外家南樓覺  
後有感寄內弟阿魁阿愚四首

樓頭殘燭迥淒清樓下愁人怨曉明千里斷虹隨夢遠  
五更零葉打衣輕風鴉巢樹知前後竹馬鄰童識姓名  
若把舊時情緒譜杏花樓上是三生

兩家兄弟玉成行十五華年逐隊忙作達最憐羣上樹  
學趨猶見汝扶牀燈明樓閣催書急花入闌干樹夢長  
說與封奴渾未識却教阿母倍淒涼

梅蕊初飄杏復葩商量春事已如麻拜殘阿姊簾前月  
看足鄰姬徑裏花生少學愁愁未慣孤眠遲夢夢還賒  
墻頭風細星辰定不識何時轉歲華

鞭絲爲客去匆匆一事如今恨轉同尺五濞波輕燕艇  
三層松閣紙鷺風閒中草綠埋歌扇愁裏花紅照殯宮

十九年中衰盛異欲從何處悟初終

哭錢公子中銑

邗上孤篷竟未歸絕憐愁鬼斷斜暉京華迢遞猶傳札  
慈母殷勤尙寄衣五日正沉江畔黍一官虛憶省中薇  
魂消送我谿南日苦說燕臺伴侶稀

童年經術本無師曾愧尙書國士知死日尙聞憐趙壹  
諸郎都解敬袁滋卅年宦達虛身計五葉門衰賴子持  
莫愴筵前小兒女更愁堂北鬢如絲

七夕露坐憶孫大

瓜果筵虛薄露零懶看河鼓說精靈思君永夕空濛望  
南斗光中第一星

讀長慶集寄孫大

長慶集樂天自序長微之七年今亮吉春秋三十四而季仇年纔二十七與微之小于樂天同二人之交亦不減元白所不逮者或名位耳其他尙可企及也爰作一詩寄季仇并邀同作

偶讀開成少傅詩七年我亦長微之神仙共挂蓬萊籍風月追吟楊柳枝一代才名何必愧九原交誼本堪師江州司馬通州倅料理頭銜似往時

結交行寄孫大

浮雲變滅安足論爾來友者洪與孫九天仙人不嫌謫一代交道殊能敦君不見結交不過通侯門賤客雞狗

無由分結交不入春風場少年鷹犬徒相妨與其長安  
城中交俗儒不若咸陽市上留博徒俗儒言貌師中庸  
綠飾經術爲三公君無更齒馬東海我尙恥說胡華容  
博徒之交亦何有長笑傾心在杯酒一言席上吼雙龍  
千古英雄困廣柳我交黃子景仁十七年病鶴雖病形  
疑仙妻愁親老不思返白日憔悴長安眠趙生懷玉之  
交歲逾十持論英英輩難及洪生狷者不欲狂知我只  
有真州汪端光壬冬岐路一握手朗若璧月分輝光驚  
濤飄蓬亦思止自問心期只三子江山花月久歎陳乃  
貢清氣生茲人非惟文藝擅儕輩亦覺至性流真酒我  
交數子止可生不若交子兼幽明我交數子皆許身不

若許子兼心寬三千里路夢飄忽二百十字言溫存

江甯寄書才二百十字

我廢我蒿篇子悲蒙楚詩中年哀樂亦如

一我若非爾形難支自從五年來會合一一數茲離檢

歷日已過一百五黃金臺下才士多我不見爾還高歌

癯黃短趙屢相憶要聽秉燭言如河君不見今人交道

皆猷貧不識古有范史雲今人交道皆猷真不識古有

龔君賓誰言勿頸交我弔成安君誰言投漆堅我訪雷

與陳乃知天生爾我爲交道不獨文雄詩傑垂千春

華陽憶舊行寄朱博士沛林海州光照汪縣丞蒼霖兼

呈孫丈勳及令子星衍

異時我客華陽春一方宰吏無俗人汪丞治績亞林宰

更有博士真天民吾鄉丈人亦軒特鏡裏顏紅鬢斑白  
四家僕從屢招人一縣醇醪止供客邑中賢者沈與王  
亦設薄具邀驗狂居留三月九十醉餘者病酒眠匡牀  
天然愛樂還相召妖鳥鳴春已驚告碧樹愁聞山鬼啼  
縞章夢致谿神弔城東一別事若麻三載復看城中花  
宰官擢守縣丞徙博士貧老辭還家當時我識三公子  
兩抱妻憂一身死乃知造物最忌狂自悔驗顛亦應止  
孫郎悟早雅興除脫然樓上思著書我來憔悴寡顏色  
戒酒怕過山公厨前遊歷歷春時節欲著思量怕愁絕  
鳥翅岡南宛轉蕭青元館裏昏黃月人生年壽何須畫  
三十當令一生畢已分琴書付鄭三

謂霞浦鄭聯華林君愛塔及華于余

者未應蹉放同王七

謂縣中秀才王廷俞

春華已過憐秋曉落落

天空寄魚鳥隔世形容照水愁無家笠屐登山好博士  
年衰屢致思縣丞無息宦聲遲一篇爲寄淮南守慰爾

風前哭子詩

代書寄汪大端光八十韻

百慮不失一子才爲世需六經甫通三我識愧里儒才  
識工拙間出處可不圖子意乃不然勸我入

帝都爲言予有親尙欲依菰蘆子親存我亡一語傷藐  
孤負米十四年婁空粟與芻子行燕趙歸勤作反哺烏  
我成吳越遊忽爲失母雛我生慚世間感子引作徒爲  
傾囊中金爲計道上儲六百里水程十八日旱塗歷歷

夷險郊孰宿孰可備英英公卿中孰謂孰則毋我足雖  
云幼子口亦已瘖感子珍重心臨行野踟躕譬若深谷  
風幽草亦漸蘇存亡心已傷離別淚屢枯萋萋四月花  
莽莽長河蕪挈弟旣慘悽念友更咽鳴相離第一程夢  
子秦郵湖涼月忽抱肩老魚窺汀蒲東阿縣西門夢子  
又在吳俱爲少年遊鐙舫狂呼盧三夢宜武坊斜日殷  
銅鋪新知無一人知子應念吾每夢必有淚每淚必有  
書書皆千百言紙惡字跡麤豈惟字跡麤兼愧言辭紆  
長安識君人謗譽亦復俱每苦立論嚴憎子所服殊我  
不置一辯歸室始歎吁欲摘天半星爲子冠上珠欲剪  
湘中霞爲子身上襦天河濯五色色異凡紫朱天衢曝

衆文文匪常羅繡春月潤子顏秋露濯子膚日吐瑰麗  
辭稱此珮服都日陳琳球響稱此顏色姝留侯似婦人  
曲逆美丈夫不聞史傳譏但覺流輩無塵冠敝履中不  
必德義孚囚首垢面人不必名實符雖然願一言少歲  
亦已徂二十顏尚髻三十頰有鬚吾徒勤事業弃置常  
所須要當惜心神何必營衣裾急從良友箴息此俗論  
誣明年登玉堂三館步復趨貽茲老成規莫被輕薄恩  
我來人海中戚戚意寡娛因緣識文人千百量以車多  
文或爲史小智僅作胥行雖歷方州見乃守坐隅羣謹  
出詩編朱墨盡貢諛立語苦不工已謂鮑謝逾我時出  
直言衆目怒以盱謂我立論高謂我制行迂一心苟無

慙兀兀任毀譽求子素識人又各間一區非無楊生清  
亦有黃子癯旬日乃握手餘皆掩蓬廬時時讀子詩消  
此嘅與獻子才信鵝鸞我筆非於菟頗愧紛疊來索詩  
若索逋我常思子言氣歛不敢舒逢子乃一發筆禁口  
亦呼子書亦易作字錯墨屢塗前聞欲移家急札馳郵  
奴煤車米石昂詎可攜妻孥况復堂上衰行坐總欲扶  
豈任舟車勞與此食粒糲詩儲潤書及瘦方木言皆悉  
錙銖詎不爲子謀使子烏就箴子行試禮闈先利矛與  
爰亦思賀萬錢不若儲百壺倘或成同官雅足見發紵  
拙効我亦收令謨子先敷壯往庶有程少習藉可除被  
酒一縱言省札應豁如

九月初二日得家書始奉適王氏姑七月初九日訃翼  
日于崇南坊寓舍爲位以哭哀定并賦詩一章

吾祖憐嬌女慈闈愛小姑弱年尤痛子

適王氏適年舉子數已而孫

中歲卽從夫憶嫂顏常瘦思親淚屢枯重泉真健羨骨肉慶提扶

八月二十日偕黃二暨舍弟飲天橋酒樓

長安百萬人中有賤男子日挾賣賦錢來遊酒家市昨日送君回今日約君來送君約君于此橋長安酒人何寂寥酒人無多聚還喜破帽塵衫挈吾弟攝衣上坐只三人爽語寥寥落檐際君言內熱需冷淘我慣手冷應持螯閒無一事且沉醉不然辜負青天高青天高高復

飛雨二十四橋風欲舉飛蓬卷葉十里間直視城南落  
驚羽濃雲欲暗南郭門斜日忽破千林昏陰晴萬態鬥  
秋景醒醉一夢恬吟覓持千盞揮百尊不覺樓上空無  
人君歸雖遙莫先走萬事要須落人後君不見門前豪  
騎控雙龍笑我西行馬如狗

重九日陶然亭遇吳四端彝話舊因憶亡友唐肇文并  
寄令弟孝廉熊

辭君久已事征鞍猶作爐頭俠少看九日一尊同瀆落  
十年三見話辛酸唐衢骨冷誰重哭吳質心愁自寡歡  
應愧故人狂未死典衣還欲滯長安

送繆公子公儼之江浦兼簡孫大

余四月中入都與繆  
遇于道旅遂訂交焉

相別翻憐相見遲，坐中人影壁間詩。  
蒐搖青草東風路，夢立黃河遠岸時。  
與穆初相值處病馬去來應有恨，秋禽蹤跡  
本誰知。寥寥門閉紅塵裏，殘臘都將濁酒支。

去去遙山一桁青，愁程先已夢中經。  
江南迢遞傷情思，公子知交有性靈。  
人據竈觚看讀易，暫探石闕記按銘。  
來朝風色東南便，我亦商歸大海萍。

好因魴鯉答枯魚，總覺蛩蛩念距虛。  
白日懷人當檻坐，紅雲羨爾對江居。  
身名莫笑中條叟，鄉里須乘下澤車。  
丙舍一椽松數尺，未妨他日訪吾廬。

僧寺與徐書受話舊卽贈二首

一夕長安雨寥寥，話十年寬驚隨逝水。  
霍病憶空天被

酒還如昔題詩已遜前窗風與庭葉蕭颯枕函邊

爾念無兄弟逾年服姊喪余尤痛風木復此感姑亡骨肉重泉滿松楸隔歲長相將營丙舍頭白住江鄉

東坡生日集翁學士方綱蘇齋卽送羅山人聘出都

廿載我居公舊宅

東坡卒于常州其宅前屬余外家蔣氏歲常以生卒日祀東坡并爲會

一年兩度薦清醑殊鄉作客初逢臘學士開齋尙號蘇雅有詩名做西蜀愁聞征棹反東吳買田儻遂中年願亦擬歸收陽羨租

被酒與吳生麟夜話

遼東道士應成窟陽羨書生莫化鵝尙有十年人海願却來吹笛共高歌

程編修晉芳齋觀元耶律文正畫象賦

先生好古構兩軒邀我讀書兼開尊頎然素幅出偉人  
云元宰相遼王孫斜陽欲下壁色昏慘慘若動須眉神  
眼光下欲視千世限以尺幅猶英麟長身盤頰大獨科  
追憶至論如懸河人生歲月百年耳公甫及半勲何多  
巍巍一代推上功替人只見劉秉忠文章年壽亦相似  
若論志節尤推公異書壘腹奇難剖落落吾徒出公後  
詞筆還驅入海濤姓名欲戴垂天斗卽今卷盡空堂走  
反復公名難太口焚香閱傳意有餘更酌坊南一杯酒  
題僧石濤竹西歌吹圖

浮雲急景安尋留我頃四月離邗溝隄邊歌吹尙沸耳

回視已隔天南頭懷鄉念友殊孤悶我見此圖驚復問  
中有春波蕩漾舟七年往事帆檣趁豈惟前事榮方寸  
畫裏朱顏亦凝恨紫陌牽愁柳作絲紅窗吹夢風成陣  
回流一曲波如剪合隊春人若鴉點三尺寒波一寸萍  
游魚尙厭春塘淺誰從門際吹短簫萬朶花落從東飄  
尋圖我欲眺江左雲樹一抹橫林梢此詩此畫俱高格  
墨粉淒涼年近百今日揚州勝昔時歌臺已徧隄南北  
吾徒流滯幾春秋蒐寄東風第一樓爛醉莫嫌狂杜牧  
枯僧亦復繪揚州

送趙表弟襄玉南歸卽呈侍御舅氏兼寄孫大

孫郎約我遊燕臺爾者八月無書來趙生約共長安住

亦復驅車覓歸路堂前白髮各數莖一名驅爾不得停  
雖然親在亦須仕努力勗爾所榮名榮名得失尤須數  
落落塵中尋故步我愛時吟短李詩人言合獻長楊賦  
我年四五卽識君相與賭字傾其羣爾來歲月及卅載  
文筆喜各持堅軍風霾雨黑傷年少我爲窮愁著書早  
君無羨我覆瓿書我實輸君事親好橋東惟爾巷南孫  
海內知交有幾人勸君歸後復垂淚偃卧一室傷羈嵬  
人心不同面尤異尺五惟營閉門地根矩終非入世人  
寥寥時有胸中氣頃攜弱弟住長安黃葉秋深補敝冠  
貧來雅復對牀卧眼底誰足謀饑寒窮冬道我顏何瘦  
我爲傷親益思舅三徑憑傳問訊書十年我受恩私厚

更傳消息語孫郎，莫向人前倚酒狂。  
殘歲燕山風雪冷，梅花開後夢干場。

客感寄孫大

燕臺春日試飛蓬，无盡山川不定蹤。  
客久尙須遊二嶽，歸遲真待長千松。  
成鄰幸結東頭屋，投老同聽北寺鐘。  
何止與君交一世，此心無昧總相從。

憶汪大蓮花寺辨狂大

北巷南條共夕曛，見時雖少夢時勤。  
愁多壁著疎疎字，病久窗生黯黯雲。  
後死未妨還屬我，此生無恨爲交君。  
中年退盡春衫色，只有爐香尙細薰。

敬亭山色對牀眠，彈指交期已九年。  
詩卷正愁盈篋底

風裁無恙立鐙前  
頽垣怨雨傷春早  
古屋踈梅照夜鮮  
應愧故人還未達  
賣書真欲學遊仙

與楊三倫夜話并悼蔣寶善楊炳文

何因心跡許相從  
失母辭家共轉蓬  
病裏春生勞遠望  
愁邊書少憶狂蹤  
孫  
千年城郭須歸雀  
三客鄉閭總號龍  
我擬買田身計穩  
倚門同數九株松

被酒閒徵少日場  
棲鴉辭樹燕移梁  
癯楊門徑春陰遠  
秀蔣池臺夕雨荒  
數口尙存顏轉瘦  
幾生修得鬢初蒼  
宵談祇獸燈迷燄  
不覺風聲徹戶涼

連得孫大書却寄

江東有客寄唵箋  
苦說人生祇百年  
多病況緣憂患積

無家仍復歲時遷，雙垂別淚燕山末。  
千折歸心春山前，心事累君身累世。  
茫茫愁日又無邊。

和汪大憶舊詩十二首，卽效其體。

十五年前在謝家，上樓明月下樓花。  
如今門鎖空春裏，一任閒枝閱歲華。

病怕東風護曲屏，每逢長日恨春晴。  
幽眠未起西窗晚，銀燭光中度一生。

繞砌疎蘭入海棠，眠春竟膩不分香。  
當時夢醒匆匆甚，開戶斜陽滿鏡黃。

自愛幽居不結鄰，樓前十里漾空春。  
溟濛水色淒迷雨，只向疎闌淨麴塵。

山色依楹水繞牆一層雲氣一分涼  
高居莫掩窗前後引得銀河接鏡光

城隅一曲上無端城裏春衫城外看  
只倚北樓傭不走柳絲衝面怯春寒

見不分明夢亦空接天樓閣有東風  
幽窗覓徧聞歌地只在疎螢細草中

水花春徧憚家池十五華年鑑影時  
今日再來羞野鵲柳枝添恨鬢添絲

剪燭三更鬢乍梳宵遊還覓徑生疎  
誰知別有關心客鸚鵡橋西識面初

兩重門內數春星燭影微紅鬢影青  
容易使他籠鳥楸

不來相伴讀仙經

看銓歸後病多時花滿房櫳總不知今日試將簾幕啟  
亞墻開到殿春枝

移家一棹去匆匆蟋蟀銀牀烏玉籠盼得近春消息到  
情懷無奈隔江鐘

贈莊四寶書卽題行幃

京華遲日飲千鐘風味都憐酒味濃入世偶然成短翮  
長松如此亦雙龍身因早客眉痕皺書欲名家指鬪重  
手版到君須遠宦未應同我住鵝籠

連雲樓檻接深池記否兒童竹馬時花底衫裳同侍母  
簾中書策遠尋師相看夢冷情疎日欲詠兄肥弟瘦詩

選憶謝家羣從好玉顏都已鬢添絲

二月十五日與汪大至天橋酒樓薄飲乘月而回

青郊三里月紅燭一杯春痛飲消餘晷能閒有幾人壇

雲入窗暗山鳥上樓馴只隔軒舳外車塵雜馬塵

爾念邗溝水經時照玉顏予悲白門柳曾復伴春閒鄉

樹偏繁夢華年渺未還疎櫺愁絕處聊與眺西山

憶舍弟

時抱病南歸

弱弟如形影相隨作客初抱關吾妄願

舍弟近在館中  
超走數年後或

當尋

一官涉世爾尤疎粟水顏常瘦塵沙髮屢梳佳好待營

田一頃早與共扶鋤

籬桃三兩樹歸及見垂枝藥畏須頻製郵書莫更遲饋

疏憐阿姊挈神識諸兒只有傷心處門閭入始知

春江行贈汪大

紅闌干影接天一江春水闌干前闌干搖紅水搖綠波  
底闌文百回曲我共春江魚同飲春江潮潮聲出入鯉  
魚腹水色蕩漾吳儂瓢吳儂家花滿畦春風來江北飛  
君門前千樹桃春雨落江南飄飲水暮還朝思君不可  
邀水遙遙尺五尚夢迢迢十九橋

憶遠行寄孫大

波淼淼星搖搖約君不來算已朝吳帆停越車駕約君  
不來春已夏春光九十靜掩關幾年春閒君不閒曾雲  
萬里宵征路却恨君閒我難住十五已作同巢烏南枝

北枝名對呼十九更作尋源魚曉行雖遠莫復俱東流  
水深南枝有陰千里與萬里兩心同一心朝心徘徊莫  
心怨幾日春蒐自淩亂莫剪踈桃入戶枝春花開上橫  
門扇

谿南曲

谿西月不華谿北桃無花風光只落谿南路和月和花  
築樓仕花枝二月人二旬樓高一層春一分谿光已隔  
畫橋影柳色自門疎闌春岸雲凝紅水雲白總遜春衫  
好顏色百花開處百禽鳴樓上添衣樓下行尋芳肯到  
春谿口隄上行人學垂手放船肯過長河濱牆頭女兒  
做畫眉畫眉尚避春鶯見照鬢都疑水禽羨鏡裡濃雲

曉上頭竹中輕粉宵勻面春旛親製初護風樓角三面  
懸玲瓏眸迎深館迢迢綠手展文窗扇扇紅星疎夜久  
愁猶立露冷草香蟲尙蟄百餅薰籠總厭燒啟帷試放  
生香入消息今年異往年客巢新定故巢遷愁邊曉泪  
疑含露望裏春潮已接天傷春曾到春臺畔籠鳥生疎  
茶敢喚背客親移北戶鐙呼鬟更掩重門扇短短疎籬  
漠漠塵沿谿樓閣對牆身緣知谿路經三折只共波光  
住浹辰可憐門左閉亭塢三月誰爲衆香主拋客年光  
誓不停迷人草色尋應苦一樣扁舟去未還五湖蹤跡  
異三山春來依舊花千樹夢醒空愁月一彎

二月二十三日復與汪大上天橋飲醉歌

著書不爲千年計直借陳編壓奇氣出門不逐萬古愁  
聊上高閣開吟眸天橋樓前一杯酒昨日苦思今在手  
我能飲君能留三十莫抱二十憂識君二十年尙少屈  
指十年君未老眉痕鬢影未減青一色綠衫同似草盈  
樓飲客我獨眠未飲滿擲青銅錢座中誰識兩少年江  
南江北無一田尊深酒熱莫更催頭上一雲紅覆杯休  
嫌飲盡衆賓散伴客時有春禽來城門樓上春陽滿一  
鳥轉春聲緩緩城西山色影接天極視惟愁目光短今  
日白晝飲復勝清宵吟百壺雖盡意不盡兩客所喜皆  
同心醉顏時紅亦時白一市圍觀不相識頗說近來無  
此客

二十六日過汪大齋頭見餉酒者汪大云留以相待歸  
後夢汪大以昨酒別餉人意甚不樂醒後戲作此以  
寄之

故人不入夢入夢牀頭酒帳中燭影欲碍眉枕上道書  
猶在手夢時得失乃可知莊生偏悅夢醒時君不見心  
空不著閒輕重憶酒憶書都入夢

宵望

登墟聊一望萬瓦月光齊地迥風生樹春濃露覆隄雲  
光迷向背田綠誤東西莫逐巢枝鵲回聽警曙雞

屠大令紳以報最入都話舊賦贈四首

遠宦迢迢十載餘相逢我亦頷添鬚賢勞已覺官聲起

憂患偏憐壯志虛，釜欲生魚推上考。書應成蠹少甯居，  
重來流輩俱清秩。莫晒狂奴尙鹿車。

一縣無能滿百家，水深山瘴路尤賒。未妨茅屨吟詩鉢，  
慣聽荒城破曉笳。民雜猺獞難定戶，官清胥吏猷隨衙。  
做衣報政來京闕，却使尋常計吏譁。

剪蔬我奉北堂餐，市酒君憐阿姊寒。君伯姊適汪氏與  
余鄰居恒主其

家五載篝燈通夜紡，常時籬落饋春盤。青雲志節賓朋  
慰，綠鬢升沉里巷看。今日乍逢先涕下，板輿天末羨承  
歡。

門前都復有青山，憂患時時擬閉關。客早自憐華鬢改，  
官貧莫愧俸錢慳。閒中歌板消年歲，君喜歸後船遞  
度曲歸後船遞

往還我亦尙營千載業著書多欲待君刪  
得內寄衣

縫裁初見汝封題百結蕭蕭故縷稀猶恐亂將慈母綫  
此生相殉只鶉衣

送繆公子公儼出都

五嶽未陟一欲歸難戒塗撫劍送子行浮雲亦南徂子  
有東顧心戀此巢上烏予褻欲南馳念彼濁水鱸兩地  
忽易居一心安得無子行過岱宗爲我謹獻書已辦十  
兩屐願屈神所都俯視六合間靈氣藉發舒神乎幸勿  
哂東海賤丈夫

送董秀才思駟南回

曙色起北垣星隱西南隅暉暉殘月光與子升遠墟輪  
蹄百萬中中有吾子車車行飭弗停遠復屈子慮妻子  
念遠歸悅志慰歎噓七載殯在堂窀穸匪得徐江流入  
海州地大土亦腴鬱鬱千高原富此人鬼區子其勉營  
作庶効人子勛吾將爲子文明子志節紆恭聞哲人言  
爲善報有餘勿以世澤深莫此祿利虛研經世務通窮  
達盡足娛吾家北溝頭數武距子居近聞積滯霖尺水  
通積淤黃葉堆作薪復富鰕與魚兒童各兩三應客清  
且癯他時著書人兀兀子與予

送莊四寶書至廣東得十二韻

我辨東山屐明年上岱宗鬢牽山霧綠眉隱海雲紅爾

泛南溟棹虔心禮祝融地虛風力上天濶日華東嶺嶠

游逾壯川塗望欲窮褻人依畫舫憑客寄詩筒遠宦憐

公舉

謂令兄寶象時在雲南會澤令

微疴念敬通

謂舍弟

兄三郡別尊

酒兩年同得句酸醜外言情哀樂中艱難知稼穡少壯

歷磨礪住覺雞餘肋歸慙鵝有籠早營田二頃耕鑿慶

年豐

爲楊孝廉夢符題錢三維喬秦中畫冊卽寄維喬

特驥

縣

何時得入函谷關放筆卽落終南山南山連綿盡不竟

拔取一峯來入鏡胸中有山卽有樓下筆有川兼有舟

豈惟山水色不別樓上客醉疑眠鷗醉顏昏昏憶孤在

逸客都爲酒錢累，剖胸欲入秦中雲。  
洗眼仍須渭川水，南山浮光北山夕。  
陽飛橋如雲，不能跨怒蛟。飲渚裁成  
梁，林梢幾尺天光足。怪石森森點寒綠，  
此間應復置錢郎。四十癯顏尚如玉，  
南高峯北高峯。宦遊今落名山中，  
錢今官山川二月尤清曠。憶共錢郎飲湖上，  
楊生思家靜掩關。客帳夢好時時還，  
吾曹須勸苦不閒。直當爲畫迢迢一谿之綠，  
水落落湖上之烟鬟。

奉酬繆公子白沙河見懷詩

爾如華亭雀，不欲識二陸。解后得值張季鷹，  
雅志不復矜飛騰。我如昭邱狐，讀書名博物。  
茂先可語不識機，亦欲辭歸住蓬葦。

卷施閣詩卷第二

陽湖洪亮吉著

憑軾西行集 辛丑壬寅

書從兄顯祖畫卷

家有十步池引水蓄百魚室有三尺墻種竹滿四隅令  
其泉上有石竹中通渠穿徑之筍不以入餐過橋之魚  
不使上竿魚皆習主人已忘江湖思修竹何娟娟亦斂  
干霄姿主人不歸歸有時主人有一弟侷儻素好奇會  
就主人宿愛此半畝之竹一畝池奇石落落清流澌澌  
掩戶十日臥出關百里馳蓮華峯頭攬明月挂爾谿邊  
屋角之南枝

酬黃上舍鉞

閉日偶傾燕市酒，經春別爾謝家樓。  
故人入夢疑黃鶴，早歲相期共白鷗。  
判與苦吟常入夜，最憐華鬢欲經秋。  
江湖浩蕩休歸急，風月分番且賦愁。

趙大至得孫大入關之信兼聞蔣表弟良卿欲入都城  
東酒徒無一人居里者感賦此首近簡黃二楊三徐  
大

一歲居里傾千壺，兩年爲客償宿逋。  
城東日日添酒壚，城西時時出酒徒。  
城東酒樓一十六，城中少年出相續。  
酒翁歎息酒姬愁，可惜少年皆遠遊。  
少年誰最狂雅數，孫與黃就中短趙差。  
有檢結束身手趨唵場，東風吹春

入酒樓當時少年百不憂三更酣春樓上頭紅燭光滿  
樓前洲騎龍弄鳳世不驚只有酒家知姓名城東城西  
路回惑只有酒家門徑識酣嬉落鬼非可常一朝餞我  
東急裴濃雲浮江雨暗海海風吹人顏面改離家豈獨  
無酒筵太息總無諸少年出門各歷路萬千前後差喜  
皆遊燕酒徒十輩五得官餘者未免謀饑寒孫郎苦戀  
里中樂昨亦襍被辭江干新春忽夢晴谿曲暗識溪南  
草應綠醉尉衙前碧月圓蘋風乍轉春流足花枝縱好  
酒縱醇我識一城無酒人豈惟花發無酒人兼恐減却  
樓前春春去春復來春情忽然失朱顏變蒼顏黃金鑄  
不得君不見少年雖歸非昔日又有城東少年出

清明日闌中夢先慈感賦並寄孫大關中二首

三千里外無家客，寒食傷心念北堂。  
未死夢魂通夜永，浮生淚眼怯春光。  
頻移骨肉依青隴，雅課兒童種白楊。  
天末故人還抱病，風檐此日思茫茫。

爾緣親老亦遊秦，短札頻言去住因。  
句曲宦窮居未得，穀函塗險客方新。  
溪山迢遞應謀築，天地分明許結鄰。  
各有著書心跡在，未堪終歲作游民。

十八日早偕同人至天橋酒樓

閒蹤亦已忙，侵曉試遊襄。楊柳閉門處，桃花發曙光。  
露香深幕徑，鵲語靜周廊。屈指春三月，還輸逸客狂。

過橋春五里，登閣樹三重。風轉闌聲沸，塵將遊騎衝。  
鶯

花憐震蕩衣袂競織穠咫尺郊壇外春雲總似龍

法源寺訪黃二病因同看花

長安城中一畝花遠在厘西法源寺故人抱病居西齋  
瘦影亭亭日三至一叢兩叢各稱心前年去年看至今  
今年花盛病亦盛轉恐病久花難尋天光未發雲半沉  
墻角有樹交深陰故人此時花下吟頭髮露沐光浸淫  
梨枝桃枝分不得楊柳接天青一色海棠雙樹復絕奇  
花背深紅面浮白長安一畝不數看莫夢江南千里陌  
法源寺近稱海棠崇效寺遠繁丁香花時可惜雨聲阻  
不爾遊屐時傍徨看花抱病還難顧我更因花乞同住  
春陰如夢不逢人墻角游禽出無數故人逸興猶不凡

日復一訪同幽談君不見回途却值如龍馭日晚羣言  
看花去

三月二十六日同人至崇效寺看花作

絲風飄林雨灑空寒甚十日留春容馬頭拂青馬尾紅  
青山亦隨馬首東岡原東來氣深旺青山低昂瓦檐上  
迷行一里始出林古寺山門兀相向門高徑古叢青草  
松已百年僧亦老門前見樹尤絕奇屋畔無枝不娟好  
高低深淺藉發舒禾苗不生地力儲培根渥節厚人力  
挺此七尺花形殊樓前一株復兩株捎破屋瓦參浮圖  
危檐高柯勢凌躡意以向背爭妍妹海棠無言墜桃杏  
鶯聲不來空晝永尋廊萬點白參差恍若銀河瀉星影

閒心愛看日午花采色詎似殘春葩原形十里足雄厚  
天路尺五饒清華花開雅興無虛日三度殘春留冀北  
柳絲廳北敞高筵贏得山僧姓名識看花十輩多少年  
花下兩兩聯吟肩花枝已闌離思牽時暈二景儼欲南回目斷送  
爾江南天來時車鐸喧去時塔鈴語明日狂風遽如許  
竹裏猶零前夜雨

送崔二景儼南歸讀書并就婚

憶昨同醉長安之酒樓少年十輩君不浮憶昨同跨郊  
肩之駿馬偕遊七人君最雅君才豈比凡少年我意雅  
欲追前賢長安城中與君友五度碧月聯吟肩我交于  
世皆蒼老朱賈淪亡益悲悼謂全叔朱訓導沛高郵賈文學田祖吾曹緩

急須託身詎敢相輕此年少我感古人志行超雖未絕  
交能寡交身今縱賤有殊稟冀與一世回輕與十年此  
志不暫忘世人不知謂我狂鄉閭益復盛嘲毀并以餘  
論加孫郎畏讒一室居疑螫昨者孫郎有書及我謀于  
衆謝不敏君獨不辭乎燥濕亦知人生饒緩急難爾少  
年尤獨立朱門紈綺艷障天獨出英英矯餘習吾儕快  
意得一朋如入玉陛升金門急持一書報達人謂此年  
少非常倫離風昨日吹原野花葉紛披已成夏交君未  
久別念侵獨持一盃輿論心酒樓花開三面陰馬蹄浮  
紅尺五深燕秦十年遊近始抵鄉土晏公祠外簫鼓喧  
競渡來看日端午離程關隴復數千

時余擬  
遊秦中

南瞻無家

有墓田桑根草堂富經史舉半贈子窮雕鐫識君不嫌  
選別君不嫌早讀書谿南柳陰好新婦窗前月痕皎人  
生聚散殊草草君不見百回相思令人老

四月初二日黃二景仁邀同人于法源寺餞春卽席同  
賦得餞字

江南百萬花不看長安一枝春愈顯江南銓客花成癖  
買屋花中靜排遣憶昨欵門客大至半畝綠苔橫被踐  
抱疴應客竟日勞客去閉門頻仰偃繞檐百匝銓成惱  
昨黃君賦  
憫花篇客不逢嗔花得譴吾儕立論貴平允勞者尤  
當戒衷褊今宵忽復驅童至雅意欲爲花作餞書云昨  
值風雨驟草色反深花色淺惱花不得更憐花痛飲無

辭袂衣典黃生兩歲爲花病一歲惱花愁可免祇憐花  
謝客不留餞客餞花同一宴屬生悔過復賦詩明日欲  
來花下展

將出都門留別黃二

拋得白雲谿畔宅苦來燕市歷風塵才人命薄如君少  
貧過中年病却春

枵腹誰憐詩思清掩關真欲廢逢迎期君未死重相見  
與向空山證世情

與丁二履端夜話卽以贈別

時余約與屠大令紳共買  
外家鷓蕩莊別業丁君言

已爲渠親串所  
得並以志感

燕車代馬三千里越水吳鄉二頃田此志十年仍未遂

對君一夕竟忘眠，憑將書杜傳廉吏。莫更犁鋤課少年，未擬買山先買水。會須笠澤共耕烟。

新交數爾及崔陳，握手臨期意獨伸。聶政母亡尤念姊，馬卿家在總依人。休嫌骨相前生薄，敢詡心期數子真。風色滿天雲氣冷，更從岐路入西秦。

涿州三家店水木明瑟，舍弟前共過此。有誅茅之思書

此以寄并當示孫大

異時我作樵蘇計，幸有孫郎及難弟。夫容湖畔結廬好，我亦川居富菱芰。門前流水屋後山，照影幾度驚孱顏。野夫何時得暫閒，偶借客夢歸蓬關。原空雅飛十餘里，烟柳千條拂花起。吾家令弟昔愛之，殘月扃門數回啟。

卽今留滯何能走我獨橋南醉邨酒百年心跡幾相知  
持此遙遙質良友

出都行涿州道中見芄麥徧野慨然有田廬之思因作  
田家詩二十首寄意並寄芄光照楊毓舒兩布衣

朝耕山上田頗苦赤日酷雨氣來北山蜻蜓滿空谷家  
遙餼糧具釋耒坐石屋日晚牽犢歸下山泥浸足

疇昔惰農畝蓬門生長蒿頻年生計足梁燕亦來巢豐  
嗇理有常由來非一朝社日集子孫烹蔬酌邨醪中坐  
垂誠言百事須積勞

山村十餘家古木自回互筍穿來東鄰果熟落北戶居  
鄰結姻婭鷄犬互相顧出門望原田高低百餘步仲夏

天氣晴涼風集高樹茶瓜供過客留話愜幽素日晚樵  
童歸問名均不誤

二月序始和黃花徧林原濃陰滋宿麥春露洗高原雞  
豚喧早市牛羊出毀垣隱塘花爛漫過澗水潺湲鳴鳩  
聲不已釋耒聽無端心切崇朝雨都忘向曉餐

采桑升高枝衣上日華轉遲遲看春陽一谷柳花暖沿  
林緒風至對樹鶯睨睨不惜枝葉長但嫌心力短東家  
采桑女日暮行苦遠沿回大堤坐心急待同伴揮汗忽  
不停春衣又將澣

窮鄉寡文學頗愛土俗瀆茅檐八九家五世相與鄰兒  
童讀書歸行處拾墮薪偶逢大父行拱立識所親日晚

餉北臯牽衣渡橫津  
心憶朝誦書沿途諷逡巡

門前隙地稀屋後半畝  
綠桃李皆豐年云茲佐嘉穀  
高曾手栽樹均作出檐木  
日午蔭北牕茅檐靜堪托  
溪風一回蕩山果枝上熟  
童稚不識爭探懷已均足

層冰何棱棱雪積冰上寸  
日色照亦寒谿風利如刃  
經旬斷來往間里走相訊  
鄰翁釀村醪屈指年事近  
還因隔城郭甲子無可問  
晴宵仰瞻天北斗知歲闌

力耕心志純外物不得動  
雖經百寒暑寢息無一夢  
妻孥習辛勤百事常與共  
秋成共欣慰春至卽播種  
年豐賽神畢臘酒互相送  
尙哂鄰家翁年衰腰足痛

邨雞一兩聲持鎌待天曉  
出門不知塗沿林警棲鳥  
宿宿

雨零衣裳原頭刈新草牛饑我心急況復債離抱八口  
嘗苦饑飼牛嘗苦飽

墻頭百草花秋至尙顏色涼雨朝來過秋蟲鳴屋脊驚  
茲時序變當案不能食葵枝翳南軒疎黃落如積物微  
經手植幾月盈數尺榮枯本隨候催我鬢蕭瑟村女不  
感時明燈夜牕織

山泉奔曲澗澗曲使魚肥板屋臨流水當窗白鷺飛高  
枝曬魚網圓牖挂蓑衣莫訝軒牕陋黃塵入戶稀

枕上雨聲過蒲葵生曉涼隱聞屋後雷鯉魚飛過塘孟  
夏天氣昏檐間杏初黃梅實早薦新原麥亦可嘗壯健  
既不閒婦稚習築場商量醞邨醪待插三田秧

田家偃息早月出戶已扃連闥無人聲屋上促織鳴寂  
寂秋夜長眠早亦易醒荷鋤向西疇露澹明疎星

朔風吹南山黃葉滿一屋掃之向墻隅然薪一冬足田  
疇雖不廣常滿甕頭粟閉戶無所營時還把書讀

巖阿近開闢鬱鬱多桑麻人耕北山翠牛食野田花廢  
壘都牽果零疇或種瓜亂雲埋古徑飛瀑落人家境地  
殊清絕寥寥噪曉蛙

仲夏一月雨屋中衝流泉楫鏹來樹間全家具晨餐兒  
童騎土墻葺漏尙未完天霽日忽開泥衣曝先乾晴晦  
出一時驚雷復喧喧

飼蠶候三眠綠絲日千度辛勤一生內衣未識絜素東

家有嬌姿生小無所務披服非不多著新卽厭故昨暮  
會北鄰驚看機上布

寒鄉率多壽作苦況不閒暮飲谷中水朝耕山上田不  
聞求長生倏忽已百年同時一輩人白髮並及肩但苦  
東作忙日出難晏眠

種松連高岡云有先世墳一歲增尺土巍然竟成原寒  
食飛紙錢盈阡拜曾元但苦樸陋鄉諱字已不傳日晚  
祭掃歸野花紅如然

四月二十六日抵河間縣知崔二先一日發却寄此首  
車停古驛日已曛窗南一鐙昨照君鐙花未落客先起  
瘦影已逐寒鴉羣清晨共出官河左柳眼迎君方及我

楊生行色念北堂君亦曉夕馳歸  
裘車聲馬聲原上走  
百里程遙亦何有  
路人傳君好身手  
清削真同道旁柳  
道旁柳花飛貼肩  
君行曉寒籠玉鞭  
山雲濛濛壓衣重  
清冷偏宜馬頭夢  
違君百里猶可追  
車上敗鐸聲如雷  
祇愁殘月沒前路  
征馬愈嘶人不住  
丁生念友君所知  
昨復屬我傳相思  
鄉間年少盡君等  
使我慨歎相知遲  
黃梅雨廉纖南行  
亦殊苦紅棗花紛  
披東徂迫炎暑丁  
生五月方出都歸  
棹應防惡風阻君  
不見長江風黑暑  
浪煎函谷關險愁  
雲連阿兄西行路  
復干送彼蜀道升  
青天

時令兄將入蜀定省

五月初三日臨清關阻雨因食角黍有感

徂南日共風烏語忽值龍行北來雨行人衣濕饑火煎  
且復車前餐角黍沉思此景傷年載谿上幽雲久相待  
三更清夢越鄉間尙有半樓燈火在

自臨清關渡運河曉行

曉星未落催客程夢聞雨聲醒復晴車輪安穩陌塵軟  
如乘越舫烟中行河流東渡樹如薺一綫中流日華起  
行人上馬亦壯觀開闢中原數千里

館陶道中

柳絲濛濛新月高卧聞笛聲過館陶催車向路日已昃  
霞色尙映征人袍城邊古路尤雄直松矯如龍百餘尺  
古來奇士尙復然獨立原南歎高格

元城道中

元城縣東榆櫟田千株百株青蔭天車行五月不知暑  
道上漉漉鳴流泉草香花暖千家室闔戶都爲賽神出  
河流兩載喜漸平慶與農人食新麥

五日客感示崔同年景儀

馬上一枝榴火紅行人朝日發清豐淒涼古驛值佳節  
倦客如醉吹薰風風花無情翳前路客憶江南岸頭住  
野花匝地試驕馬谿水拍天喧競渡局門不出十五年  
手種楊柳都搖烟甯知今日道旁坐麥飯冷飲茅檐邊  
鄉間少年誰可憐錢郎鼓聲絕客筵爲錢舍人中統趙  
時下世已一年趙  
家樓閣昔年飲覺我盛氣何無前橋烟谿月百回白髮

坐惟留陸生笛沿谿瘦蔣亦不歸

時蔣大齊  
耀客山西

空鎖書堂

北邊宅吾儕流落縱如許客裏聞歌尙軒舉終能不學  
輕薄兒醉挈妖姬作吳語崔生似舅尤清婉共我遥程  
數千遠佳辰只惜鄉夢無卧看車前斗杓轉

未至黃河十里阻風宿辛店明日始從柳園口渡

惡風一日阻急程十里外聽黃河聲黃河聲急暑雨橫  
高浪戰雨喧三更洶洶到枕不安寐廐下劣馬時奔鳴  
披衣支戶起危坐飲滿百盞神終醒邨荒味淡食不咽  
雨暗飽嗅蛟龍腥耳中歷歷聽頽壁川原曠望生夜明  
樓高燭冷萬慮絕不覺孤月來窺楹風聲雨聲罷酣鬥  
百鳥歸樹天光清半生飽向江海宿此夕河浪聲尤驚



北邙山

北邙山頭松百步前碑後碑橫作路碑前繫馬客不愁  
還喚北邙山下渡前津流水無停刻松色蒼蒼暗斜日  
白楊無風亦蕭瑟千樹萬樹升涼月林鳥夜啼穴兔蹲  
千年不看葬貴人居僧閒乞紙錢挂寂寞知是誰家墳  
穹碑愈殘文愈好前人傳多後人少始知坏土繫功德  
不在森森數華表嵩高山色遠復蒼眼中親切惟北邙  
君不見征車須卸此山側松冢蕭蕭無暑色

尸鄉置

尸鄉置客欲愁三十里進生王頭海中山波欲湧五百  
人同死士壠有死士無生王王頭上殿目尙光九重真

龍爲一哭韓王楚王顏瑟縮腐儒遭醜理不誣王頭乃  
復償腐儒我來尸鄉中白日忽挂樹鄉人說王尙如覩  
君不見王愛士士效忠誠不若項王故人呂馬童手裂  
王體居奇功

賈誼墓

西京執戟郎綠鬢忽已皓太宗愛老臣乃少武皇愛少  
臣復老坐令人惜賈洛陽懷奇亦不值武皇灌嬰周勃  
噲伍耳是老禿翁何足詳長沙西來對宣室漢皇才高  
殊自失固知尙鬼由楚人因從楚來詢鬼神鬼神之言  
亦陳戒漢廷惟生識成敗君不見微陰賈生賦車過洛  
陽界墳荒無人碑已壞紛紛何況里中兒我亦少年先

下拜

董宣祠

東京六酷吏五輩政足觀王生非其流類合附宦官名  
儒歐歛首尹京威聲始傳董少平乾坤初平天子武徑  
直甯知長公主赫然盛怒乃可撻九重幸識小吏名殿  
頭東西排赤棒百轉安能回令項吁嗟乎臣賢王聖誠  
難得却齋王威成令直君不見祠西半里府所治道旁  
百碑名去思叢碑雖高復誰記只向道旁思酷吏

金谷園

咸甯以前多吳氛元康以來昏戰塵晉家全盛只州載  
却值金谷園中春美人顏紅與花匹百斛名珠易珠一

樓頭光碎紅珊瑚主人殉財兼殉珠傷心豈獨名珠墮  
轉眼洛陽城亦破持螯仙客最達觀興廢都從醉中過  
園花開園樂陳朝干觴暮百樽二十四友皆僉人此輩  
可惜惟劉琨

二嶠山

偏仄復偏仄西經二嶠山山溜衝作道巨石橫爲關關  
門前黑如許西飄秦風東晉雨南陵北陵事蹟陳邊識  
夏后兼周文止憶晉五帥秦三臣爲晉勝爲秦奔晉人  
雖墨衰秦人亦素服向師茫茫慟秦穆老臣此時無淚  
哭出山一里路漸平巨石夾道愁縱橫君不見山凹不  
特炎暑酷瞥有野鷹來攫肉

函谷關

車行摧輪馬傷骨一綫路中盤八日今晨始及關北門  
月黑望關關欲崩新關高插天舊關深入地赤沙濛濛  
白日翳一日一夕車帷蔽樹根石脚露土窰穴土一尺  
經旬勞居人生世稀見日面黑映戶疑山魃君不見秦  
人虎狼據谷口百二遂爲虎狼有甯知天險不屬人六  
國敗後終無秦豈如乾坤蕩平天險失前車後車行接  
轍人生快意亦有時馬上詩成車出穴

潼關門

出險復入險別山仍上山河流五夜色昏黑一片日紅  
先射關壯哉龍門濤至此始一折驚流無風舟尙失大

魚如龍欲迎日風陵津北起黑波重舸徑向中流過河  
聲漸遠坡愈迴却拉馬首看全河君不見哥舒拒祿山  
魏武破孟起門開如雲列千騎喧聲動天箭灑地時平  
雲氣亦卷舒孱卒立門司啟閉關頭飯罷客亦閒早有  
太華開心顏

華清宮

秦皇墳上野火紅萬人燒瓦急築宮築基須深劖山破  
百世防驚祖龍卧雲暄日麗開元朝祖龍此時庶鱗嘲  
人間才按羽衣曲地下未燼鯨魚膏前人愚後人巧工  
作開元逮天寶離宮別館卅里環羅綺障眼如無山紅  
闕影向空中折高處疑通廣寒窟仙妃天上坐無聊玉

笛一聲飛入月華清  
宮臺殿工欲訪舊事無衰翁  
泉流嗚咽助淒思  
冷暖曾無內官試  
君不見山前四月開海  
棠早有野人來試湯

贈馮編修敏昌卽乞題機聲鐙影圖卷子

馮君南海儒二十年不出門  
前靈絲一萬頃篋底縹青  
數千帙出門看海入讀書  
元氣吐納如露珠荒厨烟斷  
有時有百怪窺戶無時無  
豈惟不畏亦不唾一室靜坐  
忘三時偶然一出試有司  
衆喜貢爾來京師

聖人方開白玉堂  
數十萬軸陳琳琅  
蓬萊山高碧雲裏  
仙客正復需東方  
鯨鯢戮後乾坤蕩  
萬卷盤盤鱸魚上  
晴窗日一校秘書手  
冷玉籤沾薄釀  
儔居頗厭人海聲

下直只住西南城門扇似鐵不輕出解后偶識黃方平  
兩年落落京華夢文案無題輟陰諷有時中紙出萬言  
筆壑鱷魚愁不動大馮君小馮君君借齡君復告我神  
仙羣謂張解元錦芳廣南怪底少珠貝歛攝精氣爲斯文君不  
見我家空任東海頭曉日正面清江流慙無文筆東江  
海潮汐澎湃無時休江流日日晴沙壅上有松楸百年  
冢先人志節實不誣待覓數碑高置壠文章不朽今見  
之對面勞我經年思吾徒會合既有時放筆爲我唸風

詩

徐大書受浴牛圖

南溝水流北溝水行苦無舟幸有轆下午羨君使牛如

使舟跨腹穩渡春塘流南溝水清北溝水濁濁流須浴  
牛水清留濯足螺千升泥一斗尺鯉寸鰕無不有濯足  
流還入牛口君不見春田之外官路高百千萬事如牛  
毛人饒千駟不能樂君有一牛亦足豪

聞孫大二女皆殤書此慰之並促入都

朝不見爾暮不見爾不能得爾書使我煩憂不能止朝  
知爾枕一書葬知爾入酒壚鴉飛鵲翻門索逋盤盤廣  
文居今歲殤兩女隕一奴奴進興亦以給鬼復跳梁擲

此巨纒纒學吏狀升以去此纒于庭赫然三重門常有十幅符長人

鬼伯利弱徒其餘精鬼強睥睨孰敢如陽春倏然回陰  
煞盡掃除丈人康强大母扶行見中婦歸而將雛爾既

久失偶又苦貧曷不遠遊負粟以奉親長安輩流中近  
復無爾比吾當屬王三爲爾戒行李

十二月初六日宿讀雪山房話舊卽贈崔公子景儼

經旬頻過訪識爾氣無前客路三千里春光十九年錦  
書堂北枕紅燭夜深筵一夕虛牕夢無忘共被眠

謝貞女詩卽寄令子振祺

我年始十五母遣從里師其時謝氏居遠傍陳忠祠貞  
女撫子名振祺十五入學初勝衣一出一入奉母儀貞  
女雖有子室居嘗涕洟白日何昭昭顧視久不怡上堂  
奉魚飧入室餐薄糜兒行讀經解唔呶市肉食子身苦  
饑我時親見之歸以語母共歎歛爾來二十年不復相

聞知昨得尺一牘邀我吟風詩開緘忽涕零負米感後  
時吁嗟失母人遑敢措一辭雖然母前爲我言貞女之  
節世所希汝行克屬文闡彼孝且慈母今雖亡母訓垂  
忍一握管銜酸悲詩成最爾廣孝思作詩者誰洪孤兒

曾孫用勲校刊